



**BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
DOM NARODA**

- Komisija za vanjsku i trgovinsku politiku –
Broj: 02/2-011-656-24/03
Sarajevo, 15. 05. 2003. godine

Z A P I S N I K
sa 6. sjednice Komisije za vanjsku i trgovinsku politiku
Doma naroda Parlamentarne skupštine BiH
održane 13. 05. 2003. godine

Šestu sjednicu Komisije za vanjsku i trgovinsku politiku Doma naroda Parlamentarne skupštine Bosne i Hercegovine sazvao je predsjedavajući Komisije Hasan Čengić.

Sjednici su prisustvovali slijedeći članovi Komisije: Hasan Čengić, Anto Spajić, Vinko Radovanović, Osman Brka i Velimir Jukić, te Nevenka Savić, sekretar Komisije. Nade Radović je bio opravdano odsutan.

Sjednicom je predsjedavao predsjedavajući Komisije Hasan Čengić. Nakon što je konstatovao da postoji kvorum, predsjedavajući Komisije je predložio slijedeći

DNEVNI RED

1. Aktivnosti u vezi sa pristupanjem Bosne i Hercegovine Svjetskoj trgovinskoj organizaciji;
2. Prijedlog Odluke o ratifikaciji «Ugovora o otvorenom nebu» - predlagač Predsjedništvo BiH;
3. Prijedlog Odluke o ratifikaciji Dopune Montrealskog protokola o materijama koje oštećuju ozonski omotač, London 29. juni 1990. godine - predlagač Predsjedništvo BiH;
4. Prijedlog Odluke o ratifikaciji Izmjene Montrealskog protokola o materijama koje oštećuju ozonski omotač, Kopenhagen 25. novembar 1992. godine, - predlagač Predsjedništvo BiH;

5. Prijedlog Odluke o ratifikaciji Izmjene Montrealskog protokola usvojene na devetom sastanku stranaka, Montreal 17. septembar 1997. godine, - predlagač Predsjedništvo BiH;
6. Prijedlog Odluke o ratifikaciji Ugovora o prijateljstvu i saradnji između BiH i Kraljevine Španije - predlagač Predsjedništvo BiH;
7. Prijedlog Odluke o ratifikaciji Okvirnog sporazuma o slivu rijeke Save i Protokola o režimu plovidbe - predlagač Predsjedništvo BiH;
8. Prijedlog Odluke o ratifikaciji Sporazuma između BiH i Ukrajine o unapređenju i recipročnoj zaštiti investicija – predlagač Predsjedništvo BiH;
9. Prijedlog Odluke o ratifikaciji Trgovinskog sporazuma između BiH i Republike Indije – predlagač Predsjedništvo BiH;
10. Prijedlog Odluke o ratifikaciji Trgovinskog sporazuma između BiH i Ukrajine – predlagač Predsjedništvo BiH;
11. Zapisnik sa sastanka Komisije za spoljnu trgovinu i carine Predstavničkog doma i Komisije za spoljnu i trgovinsku politiku Doma naroda sa Komisijom za ekonomska pitanja Parlamenta Republike Mađarske održanog 20. marta 2003. godine;
12. Informacija o tekućim aktivnostima vezano za potpisivanje ugovora o saradnji i međusobnoj pomoći u carinskim pitanjima, informacija Ministarstva vanjske trgovine i ekonomskih odnosa BiH;
13. Pregled međunarodnih multilateralnih ugovora iz oblasti borbe protiv međunarodnog terorizma, informacija Ministarstva vanjskih poslova BiH;
14. Izvještaj sa konferencije ESCADA – Bezbjednost i odbrana u jugoistočnoj Evropi, Skoplje 17. 03. 2003. godine;
15. Formiranje Parlamentarne grupe za bilateralnu parlamentarnu saradnju Republike Makedonije sa Parlamentarnom skupštinom Bosne i Hercegovine, informacija Ministarstva vanjskih poslova BiH;
16. Informacija o stanju i popunjenosti Ministarstva vanjskih poslova BiH;
17. Tekuća pitanja.

Dnevni red je jednoglasno usvojen.

Ad. 1. Aktivnosti u vezi sa pristupanjem Bosne i Hercegovine Svjetskoj trgovinskoj organizaciji

Sjednica se sastojala iz dva radna dijela: prvi dio se odnosio na raspravu pod tačkom 1. Dnevnog reda. Osim članova Komisije, ovom dijelu sjednice prisustvovali su predstavnici Ministarstva vanjske trgovine i ekonomskih odnosa BiH: Seadeta Cerić, Gordan Raspudić i Momo Šaraba; predstavnik Ministarstva vanjskih poslova BiH Davorka Samardžija, kao i predstavnici medija.

G-đa Cerić održala je prezentaciju pod naslovom «Osnovne informacije o Svjetskoj trgovinskoj organizaciji». U prezentaciji je bilo govora o historijatu nastanka organizacije od prvobitnog GATT-a iz 1947. godine pa do današnje Svjetske trgovinske organizacije koja broji 146 članica i 30 zemalja sa statusom posmatrača među kojima je i Bosna i

Hercegovina. Zatim su tema bili ciljevi i osnovni principi organizacije – princip najpovlaštenije nacije i nacionalni tretman. G-đa Cerić je istakla da pristupanje Svjetskoj trgovinskoj organizaciji u stvari predstavlja usvajanje i implementiranje liste ugovora. U slučaju nepoštivanja legislative u praksi, Svjetska trgovinska organizacija primjenjuje procedure za rješavanje sporova i prati primjenu kaznenih mjera.

G-đa Cerić je obavjestila članove Komisije da je Vijeće ministara BiH predložilo, a Predsjedništvo potvrdilo imenovanja članova našeg Pregovaračkog tima koji se sastoji od 32 eksperta i koji je u obavezi da svakih šest mjeseci izvještava Vijeće ministara o napretku u procesu pristupanja. Pregovarački tim će nastojati da u pregovorima obezbjedi za Bosnu i Hercegovinu status male nerazvijene zemlje u tranziciji, što bi u startu značilo privilegije koje, između ostalog, omogućuju besplatnu pravnu pomoć za zemlju članicu u slučaju spora. Bosna i Hercegovina je već predala Svjetskoj trgovinskoj organizaciji Memorandum o svom vanjsko-trgovinskom režimu, koji je zatim distribuiran svim zemljama članicama organizacije. Dalja procedura podrazumjeva mogućnost da sve zemlje članice upute pitanja Bosni i Hercegovini, na koja će Pregovarački tim pripremiti odgovore. Očekivanja su da će Bosna i Hercegovina početkom 2004. godine postati punopravna članica Svjetske trgovinske organizacije. G-đa Cerić je na kraju istakla da je potrebno značajno proširenje kadrovske baze i permanentno obrazovanje stručnjaka koji će se ubuduće baviti ovim pitanjima.

Nakon prezentacije, nastavljeno je sa diskusijom po ovoj tački Dnevnog reda u kojoj su učestvovali svi članovi Komisije, a predstavnici Ministarstva su odgovarali na postavljena pitanja. Predsjedavajući je na početku preložio da se pitanja grupišu u tri oblasti: prvo – opšta pitanja oko procesa pristupanja, drugo - obaveze Vijeća ministara, Predsjedništva i drugih institucija u tom procesu, i treće – obaveze Parlamentarne skupštine BiH, odnosno Doma naroda.

Pitanja članova Komisije uglavnom su se odnosila na posljedice pristupanja Svjetskoj trgovinskoj organizaciji: obzirom na sadašnji stepen razvoja i nepovoljan trgovinski bilans šta b-h privreda može očekivati po priključenju, da li maloj i nerazvijenoj zemlji odgovara otvaranje vlastitog tržišta, kako će se to odraziti na proizvodnju, na pojedine privredne grane i šta su državne institucije preduzele da efekte pristupanja pojasne privrednim subjektima i javnosti.

G-đa Cerić je rekla da po njenom mišljenju neće biti negativnih efekata za uvoz i izvoz, s obzirom da 95% uvoza i izvoza u ovom momentu Bosna i Hercegovina ostvaruje sa Evropskom unijom. Po strukturi članica, u Svjetskoj trgovinskoj organizaciji dvije trećine su zemlje u razvoju. Po pitanju legislative, može se reći da ona već postoji ali Bosna i Hercegovina će pristupanjem morati preuzeti obaveze ponašanja po toj legislativi, odnosno po pravilima Svjetske trgovinske organizacije. Pristupanje će biti podsticaj za strane ulagače jer će se BiH smatrati zemljom manjeg rizika, uređenom i disciplinovanom. Radi se i na aktivnostima informiranja, u tom smislu uspostaviće se kontakt tačke, a za članove Parlamenta biće organizovan seminar na ovu temu.

Na kraju diskusije, članovi Komisije jednoglasno su usvojili slijedeće zaključke:

- Komisija za vanjsku i trgovinsku politiku izražava zahvalnost predstavnicima Vijeća ministara BiH: Ministarstva vanjske trgovine i ekonomskih odnosa i Ministarstva

vanjskih poslova, za održanu prezentaciju i učešće u diskusiji po ovoj tački Dnevnog reda;

- Komisija daje punu podršku dosadašnjim aktivnostima i onima koje su toku u vezi sa pristupanjem Svjetskoj trgovinskoj organizaciji, a posebno podržava napore da se pristupanje dogodi početkom 2004. godine;
- Članivi Komisije preuzimaju obavezu da Dom naroda informiraju o ovom procesu.

Na kraju ovog dijela sjednice g. Čengić je dao izjavu za štampu.

U nastavku sjednice, Komisija je razmatrala tačke 2. – 17. Dnevnog reda, a sjednici su prisustvovali u svojstvu predstavnika predlagača materijala Mitar Pavić iz Ministarstva vanjskih poslova BiH i Seadeta Cerić, Ibrahim Čengić i Mirsad Kikanović iz Ministarstva vanjske trgovine i ekonomskih odnosa BiH.

**Ad. 2. Prijedlog Odluke o ratifikaciji «Ugovora o otvorenom nebu» - predlagač
Predsjedništvo BiH**

Pojašnjenja u vezi sa ovim Ugovorom dao je predstavnik predlagača, g. Pavić. Nakon toga, Komisija je jednoglasno usvojila ovaj Ugovor i predložila Domu naroda Parlamentarne skupštine BiH da donese odluku o davanju saglasnosti za ratifikaciju.

**Ad. 3. Prijedlog Odluke o ratifikaciji Dopune Montrealskog protokola o materijama koje oštećuju ozonski omotač, London 29. juni 1990. godine - predlagač
Predsjedništvo BiH**

Pojašnjenja u vezi sa Dopunom protokola dao je predstavnik predlagača, g. Čengić. Nakon toga, Komisija ga je jednoglasno usvojila i predložila Domu naroda Parlamentarne skupštine BiH da donese odluku o davanju saglasnosti za ratifikaciju.

**Ad. 4. Prijedlog Odluke o ratifikaciji Izmjene Montrealskog protokola o materijama koje oštećuju ozonski omotač, Kopenhagen 25. novembar 1992. godine, -
predlagač Predsjedništvo BiH**

Pojašnjenja u vezi sa Izmjenom protokola dao je predstavnik predlagača, g. Čengić. Nakon toga, Komisija ga je jednoglasno usvojila i predložila Domu naroda Parlamentarne skupštine BiH da donese odluku o davanju saglasnosti za ratifikaciju.

**Ad. 5. Prijedlog Odluke o ratifikaciji Izmjene Montrealskog protokola usvojene na devetom sastanku stranaka, Montreal 17. septembar 1997. godine, -
predlagač Predsjedništvo BiH**

Pojašnjenja u vezi sa Izmjenom protokola dao je predstavnik predlagača, g. Čengiđ. Nakon toga, Komisija ga je jednoglasno usvojila i predložila Domu naroda Parlamentarne skupštine BiH da donese odluku o davanju saglasnosti za ratifikaciju.

Ad. 6. Prijedlog Odluke o ratifikaciji Ugovora o prijateljstvu i saradnji između BiH i Kraljevine Španije - predlagač Predsjedništvo BiH

G. Pavić, predstavnik predlagača pojasnio je članovima Komisije odredbe Ugovora, nakon čega je Komisija jednoglasno usvojila Ugovor i predložila Domu naroda Parlamentarne skupštine BiH da donese odluku o davanju saglasnosti za ratifikaciju.

Ad. 7. Prijedlog Odluke o ratifikaciji Okvirnog sporazuma o slivu rijeke Save i Protokola o režimu plovidbe - predlagač Predsjedništvo BiH

Konstatovano je da za ovaj Sporazum nije prisutan predstavnik predlagača, iako je blagovremeno upućen poziv da prisustvuje sjednici. Nakon rasprave, Komisija je jednoglasno donijela odluku da predloži Domu naroda Parlamentarne skupštine BiH da donese odluku o davanju saglasnosti za ratifikaciju ovog Sporazuma uz zaključak da se Sekretarijat Predsjedništva BiH upozori da će u eventualnom budućem ovakovom slučaju, Komisija postupiti u skladu sa Poslovníkom Doma naroda, član 80., tj. materijal skinuti sa Dnevnog reda sjednice.

Ad. 8. Prijedlog Odluke o ratifikaciji Sporazuma između BiH i Ukrajine o unapređenju i recipročnoj zaštiti investicija – predlagač Predsjedništvo BiH

G-đa Cerić, u svojstvu predstavnika predlagača, pojasnila je ovaj Sporazum, nakon čega je Komisija jednoglasno usvojila Sporazum i predložila Domu naroda Parlamentarne skupštine BiH da donese odluku o davanju saglasnosti za ratifikaciju.

Ad. 9. Prijedlog Odluke o ratifikaciji Trgovinskog sporazuma između BiH i Republike Indije – predlagač Predsjedništvo BiH

G-đa Cerić, u svojstvu predstavnika predlagača, pojasnila je ovaj Sporazum, nakon čega je Komisija jednoglasno usvojila Sporazum i predložila Domu naroda Parlamentarne skupštine BiH da donese odluku o davanju saglasnosti za ratifikaciju.

Ad. 10. Prijedlog Odluke o ratifikaciji Trgovinskog sporazuma između BiH i Ukrajine – predlagač Predsjedništvo BiH

G-đa Cerić, u svojstvu predstavnika predlagača, pojasnila je ovaj Sporazum, nakon čega je Komisija jednoglasno usvojila Sporazum i predložila Domu naroda Parlamentarne skupštine BiH da donese odluku o davanju saglasnosti za ratifikaciju.

Ad. 11. Zapisnik sa sastanka Komisije za spoljnu trgovinu i carine Predstavničkog doma i Komisije za spoljnu i trgovinsku politiku Doma naroda sa Komisijom

za ekonomska pitanja Parlamenta Republike Mađarske održanog 20. marta 2003. godine

Zapisnik je jednoglasno usvojen.

Ad. 12. Informacija o tekućim aktivnostima vezano za potpisivanje ugovora o saradnji i međusobnoj pomoći u carinskim pitanjima, informacija Ministarstva vanjske trgovine i ekonomskih odnosa BiH

Informaciju je usmeno prezentirao predstavnik predlagača Mirsad Kikanović. Informacija je jednoglasno usvojena uz sljedeće zaključke:

- Članovi Komisije će se aktivno uključiti u pripremu i pregovaranje ugovora o carinskoj saradnji i uzajamnoj pomoći;
- Komisija podržava dosadašnje aktivnosti i traži ubrzanje aktivnosti na potpisivanju ugovora o saradnji i međusobnoj pomoći u carinskim pitanjima.

Ad. 13. Pregled međunarodnih multilateralnih ugovora iz oblasti borbe protiv međunarodnog terorizma, informacija Ministarstva vanjskih poslova BiH

Predstavnik Ministarstva vanjskih poslova, g. Pavić, dostavio je ažuriranu listu Međunarodnih multilateralnih ugovora iz oblasti borbe protiv međunarodnog terorizma. Konstatovano je da su svi ugovori za koje je depozitar UN već ratificirani, a da je preostala Evropska konvencija o suzbijanju terorizma, Strazbur 27. januar 1977. godine, čiji je depozitar Vijeće Evrope i da je postupak njenog ratificiranja u toku. Informacija je jednoglasno usvojena.

Ad. 14. Izvještaj sa konferencije ESCADA – Bezbjednost i odbrana u jugoistočnoj Evropi, Skoplje 17. 03. 2003. godine

Članovi Komisije jednoglasno su usvojili Izvještaj.

Ad. 15. Formiranje Parlamentarne grupe za bilateralnu parlamentarnu saradnju Republike Makedonije sa Parlamentarnom skupštinom Bosne i Hercegovine, informacija Ministarstva vanjskih poslova BiH

Članovi Komisije primili su Informaciju k znanju i jednoglasno donijeli sljedeće zaključke:

- da se zatraži od Kolegija Doma naroda da zajedno sa Kolegijem Predstavničkog doma donese odluku o formiranju Parlamentarne grupe za bilateralnu saradnju sa Makedonijom i drugim zemljama koje imaju parlamentarne grupe za saradnju sa BiH, te da se utvrde kriteriji za imenovanje članova tih grupa;
- da se upute dopisi Ministarstvu vanjskih poslova i nadležnoj službi Sekretarijata u kojima će se zatražiti informacija o tome koje su zemlje, osim Makedonije, formirale parlamentarne grupe za saradnju sa BiH;

- da Komisija inicira formiranje parlamentarnih grupa za saradnju sa zemljama sa kojima procijeni da bi to bilo od interesa za BiH (npr. Mađarska);
- da se predloži Privremenoj komisiji za izmjene i dopune Poslovnika Doma naroda da razmotri mogućnost da se u novi Poslovnik uključi formiranje parlamentarnih grupa za bilateralnu saradnju odmah nakon konstituiranja Doma, kako se ne bi gubio kontinuitet u saradnji sa prijateljskim zemljama.

Ad. 16. Informacija o stanju i popunjenosti Ministarstva vanjskih poslova BiH

Po ovom pitanju Komisija je jednoglasno donijela sljedeće zaključke:

- Ova se informacija ne može prihvatiti, jer po sadržaju i obuhvatnosti ne predstavlja adekvatan odgovor na zahtjev Komisije,
- Da se uputi novi dopis Ministarstvu vanjskih poslova kojim će se zatražiti potpuna informacija o stanju, popunjenosti, razlozima eventualne nepopunjenosti Ministarstva vanjskih poslova u sjedištu i DKP mreži, kadrovskoj politici i planiranim aktivnostima u tom pogledu.

Ad. 17. Tekuća pitanja

- (a) Predstavnik Ministarstva vanjskih poslova zamolio je da se Sporazum o konsolidaciji duga po Pariškom klubu između BiH i Japana hitno stavi na Dnevni red Doma naroda.
- (b) Sekretar Komisije obavjestila je članove Komisije da trebaju dati svoje prijedloge za Plan rada Komisije za 2003. godinu.

Predsjedavajući Komisije

Hasan Čengić